

## 01

### 咏橘诗

菱蕤映庭树，枝叶凌秋芳。  
故条杂新实，金翠共含霜。  
攀枝折缥干，甘旨若琼浆。  
无假存雕饰，玉盘余自尝。

## 02

### 三日侍皇太子曲水宴诗

震德叶灵，年芳节淑。  
濯伊临灞，荡心愉目。  
骧骑晨野，挫金晓陆。  
蕙气卷旌，神飙擎毂。  
层岑偃蹇，耸观岩嶠。  
烟生翠幕，日照绮寮。  
银华晨散，金芝暮摇。  
绿水动叶，丹距映条。  
顾惟菲薄，徒承恩裕。  
艺学未优，声绩不树。  
岂辩河书，宁摘淮赋。  
徒偶群龙，终惭并驭。

## 03

### 镜铭

金精玉英，冰辉沼清。  
高堂悬影，仁寿摘声。  
云开月见，水净珠明。

## 04

### 倡楼怨节诗

朝日斜来照户，春鸟争飞出林。  
片光片影皆丽，一声一啖煎心。  
上林纷纷花落，淇水漠漠苔浮。  
年驰节流易尽，何为忍忆含羞。

## 05

### 采桑

春色映空来，先发院边梅。  
细萍重叠长，新花历乱开。  
连珂往淇上，接幘至丛台。  
丛台可怜妾，当窗望飞蝶。  
忌趺行衫领，熨斗成褊褊。  
下床着珠佩，捉镜安花镊。  
薄晚畏蚕饥，竞采春桑叶。  
寄语采桑伴，讶今春日短。  
枝高攀不及，叶细笼难满。  
年年将使君，历乱遣相闻。  
欲知琴里意，还赠锦中文。  
何当照梁日，还作入山云。  
重门皆已闭，方知留客袂。  
可怜黄金络，复以青丝系。  
必也为人时，谁令畏夫婿。

## 06

### 雉朝飞操

晨光照麦畿，平野度春翠。  
避鹰时耸角，妒垄或斜飞。

少年从远役，有恨意多违。  
不如随荡子，罗袂拂臣衣。